

## თავი VII მარეგულირებელი ნორმები

### მუხლი 16. სარეზერვო ფონდები

საგანგებო ან/და გაუთვალისწინებელი ღონისძიებების დაფინანსების მიზნით საქართველოს სახელმწიფო ბიუჯეტში შეიქმნას საქართველოს პრეზიდენტისა და საქართველოს მთავრობის სარეზერვო ფონდები, შესაბამისად, 50 000.0 ათასი და 50 000.0 ათასი ლარის ოდენობით. პრეზიდენტის სარეზერვო ფონდისა და მთავრობის სარეზერვო ფონდის განკარგვა განხორციელდეს საქართველოს პრეზიდენტისა და საქართველოს მთავრობის მიერ გამოცემული სამართლებრივი აქტების საფუძველზე.

### მუხლი 17. საქართველოს რეგიონებში განსახორციელებელი პროექტების ფონდი

საქართველოს სახელმწიფო ბიუჯეტში შეიქმნას საქართველოს რეგიონებში განსახორციელებელი პროექტების ფონდი 160 612.0 ათასი ლარის ოდენობით. საქართველოს რეგიონებში განსახორციელებელი პროექტების ფონდის განკარგვა განხორციელდეს საქართველოს მთავრობის მიერ მიღებული გადაწყვეტილების შესაბამისად.

### მუხლი 18. ადგილობრივი წყლის კომპანიების მხარდაჭერის ღონისძიებები

განისაზღვროს ადგილობრივი წყლის კომპანიების მხარდაჭერის ღონისძიებების ასიგნება 6 000.0 ათასი ლარის ოდენობით და მისი განკარგვა განხორციელდეს საქართველოს მთავრობის გადაწყვეტილებების შესაბამისად.

### მუხლი 19. ზოგიერთი საჯარო სამართლის იურიდიული პირის ბიუჯეტის შესრულების მიმოხილვა

საქართველოს მთავრობამ 2009 წლის 1 აპრილამდე განსაზღვროს იმ საჯარო სამართლის იურიდიულ პირთა ნუსხა, რომლებიც საქართველოს ფინანსთა სამინისტროს წარუდგენენ თავიანთი ბიუჯეტების შესრულების ანგარიშებს საქართველოს მთავრობის მიერ დადგენილი ფორმების შესაბამისად.

### მუხლი 20. წინა პერიოდში წარმოქმნილი ვალდებულებების დაფარვა და სასამართლო გადაწყვეტილებების აღსრულების ფინანსური უზრუნველყოფა

განისაზღვროს წინა პერიოდში წარმოქმნილი ვალდებულებების დაფარვისა და სასამართლო გადაწყვეტილებების აღსრულების ფინანსური უზრუნველყოფისათვის 25 000.0 ათასი ლარი და მისი განკარგვა განხორციელდეს საქართველოს მთავრობის მიერ მიღებული გადაწყვეტილების და საქართველოს კანონმდებლობის შესაბამისად.

საქართველოს ფინანსთა სამინისტრომ ხაზინის ერთიანი ანგარიშიდან საქართველოს კანონმდებლობით დადგენილი წესით იძულებით ჩამოჭრილი თანხები ასახოს წინა პერიოდში წარმოქმნილი ვალდებულებების დაფარვისა და სასამართლო გადაწყვეტილებების აღსრულების ფინანსური უზრუნველყოფისათვის გათვალისწინებულ ასიგნებაში.

## **მუხლი 21. დავალიანებების დაფარვა**

1. წინა წლებში წარმოქმნილი ფაქტობრივი დავალიანებების დასაფარავად საქართველოს ფინანსთა სამინისტროსთან შეთანხმებით შესაძლებელია გამოყენებული იქნეს 2009 წელს საქართველოს სახელმწიფო ბიუჯეტის დაფინანსებაზე მყოფი დაწესებულებებისა და ორგანიზაციების ასიგნებები, იმ პირობით, რომ არ დაიშვება ახალი დავალიანების დაგროვება, რისთვისაც მთელი პასუხისმგებლობა ეკისრება საქართველოს სახელმწიფო ბიუჯეტის დაფინანსებაზე მყოფ შესაბამის დაწესებულებასა და ორგანიზაციას.

2. საქართველოს მთავრობის მიერ მიღებული გადაწყვეტილების შესაბამისად, ორგანიზაციების წინა წლებში წარმოქმნილი საგადასახადო დავალიანებების დაფარვის მიზნით, ამ კანონით დამტკიცებული ორგანიზაციული კლასიფიკაციის კოდიდან „23 10 – ორგანიზაციების წინა წლებში წარმოქმნილი საგადასახადო დავალიანებების დაფარვა“ ავტონომიური რესპუბლიკების რესპუბლიკურ და ადგილობრივი თვითმმართველი ერთეულების ბიუჯეტებს თანხები გამოეყოს ტრანსფერის სახით, ხოლო სახელმწიფო ბიუჯეტის დაფინანსებაზე მყოფმა საბიუჯეტო ორგანიზაციებმა ასიგნებების ხარჯვა განახორციელონ ამავე ორგანიზაციული კოდიდან.

## **მუხლი 22. სახელმწიფო ვალი**

1. სახელმწიფო საგარეო ვალდებულებების მომსახურებისა და დაფარვისათვის საქართველოს 2009 წლის სახელმწიფო ბიუჯეტით გათვალისწინებულია 299 860.1 ათასი ლარი:

ა) ძირითადი თანხის დაფარვა – 179 035.0 ათასი ლარი, მათ შორის:

- ორმხრივი კრედიტებისათვის – 36 438.9 ათასი ლარი;
- მრავალმხრივი კრედიტებისათვის – 139 937.9 ათასი ლარი;
- გარანტირებული კრედიტებისათვის – 2 658.2 ათასი ლარი;

ბ) პროცენტის გადახდა – 120 825.1 ათასი ლარი, მათ შორის:

- ორმხრივი კრედიტებისათვის – 29 385.5 ათასი ლარი;
- მრავალმხრივი კრედიტებისათვის – 28 948.3 ათასი ლარი;
- გარანტირებული კრედიტებისათვის – 166.3 ათასი ლარი;

– სახელმწიფოს მიერ ფასიანი ქაღალდების გამოშვებით წარმოქმნილი ვალდებულებების მომსახურება – 62 325.0 ათასი ლარი.

2. უფლება მიეცეს საქართველოს ფინანსთა სამინისტროს, ამ კანონით საგარეო ვალის მომსახურებისა და დაფარვისათვის გათვალისწინებული ასიგნებების ფარგლებში, კრედიტორი ქვეყნის მთავრობის თანხმობის შემთხვევაში, საქართველოს მთავრობის დადგენილებით განსაზღვრული წესით განახორციელოს საქართველოს იურიდიული პირებისათვის აღნიშნული სახსრებიდან თანხების ანაზღაურება ან შესაბამისი

პროგრამების დაფინანსება ამ იურიდიული პირების მიერ კრედიტორი ქვეყნისათვის საგარეო ვალის მომსახურებისა და დაფარვის ანგარიშში პროდუქციის რეალიზაციისათვის და მომსახურების გაწევისათვის.

3. „საქართველოს მთავრობის საქართველოს ეროვნული ბანკისადმი დავალიანების დაფარვის ღონისძიებების შესახებ“ საქართველოს მთავრობისა და საქართველოს ეროვნული ბანკის 2006 წლის 20 მარტის შეთანხმებაში“ ცვლილებების შეტანის თაობაზე“ შეთანხმების შესაბამისად განხორციელდეს საქართველოს მთავრობის მიერ 2008 წლის 15 მარტს გამოშვებული 688 846.0 ათასი ლარიდან სახელმწიფო ობლიგაციის განახლება 640 846.0 ათასი ლარის ოდენობით წლიური 6 პროცენტის სარგებლის გადახდით და 48 000.0 ათასი ლარის გადაფორმება სახელმწიფო ობლიგაციებად ღია ბაზრის ოპერაციებისათვის წლიური 13 პროცენტის სარგებლის გადახდით. სახელმწიფო ობლიგაციების მომსახურების ზღვრული მოცულობა განისაზღვროს 54 250.8 ათასი ლარით.

4. „საქართველოს მთავრობის საქართველოს ეროვნული ბანკისადმი დავალიანების დაფარვის ღონისძიებების შესახებ“ საქართველოს მთავრობისა და საქართველოს ეროვნული ბანკის 2006 წლის 20 მარტის შეთანხმებაში“ ცვლილებების შეტანის თაობაზე“ შეთანხმების შესაბამისად განხორციელდეს საქართველოს მთავრობის მიერ 2006 წლის 15 მაისს გამოშვებული სახელმწიფო ობლიგაციების ღია ბაზრის ოპერაციებისათვის 8 000.0 ათასი ლარის მოცულობით დაფარვა, 2007 წლის 15 მარტს გამოშვებული სახელმწიფო ობლიგაციების ღია ბაზრის ოპერაციებისათვის 15 000.0 ათასი ლარის მოცულობით დაფარვა და 2008 წლის 15 მარტს გამოშვებული სახელმწიფო ობლიგაციების ღია ბაზრის ოპერაციებისათვის 12 000.0 ათასი ლარის მოცულობით დაფარვა.

5. საქართველოს ფინანსთა სამინისტროს სახაზინო ვალდებულებების გამოშვებით მიღებული სახსრების ზღვრული მოცულობა განისაზღვროს 260 000.0 ათასი ლარით. სახაზინო ვალდებულებების გამოშვება განხორციელდეს საქართველოს ფინანსთა სამინისტროს მიერ „სახელმწიფო ვალის შესახებ“ საქართველოს კანონის შესაბამისად. საქართველოს ფინანსთა სამინისტრომ სახაზინო ვალდებულებების დაფარვის აღრიცხვა განხორციელოს ბიუჯეტის შემოსულობების შესაბამისი მუხლის შემცირების გზით. საქართველოს ფინანსთა სამინისტროს მიერ გამოშვებულ სახაზინო ვალდებულებებზე გადასახდელი დისკონტის ზღვრული მოცულობა განისაზღვროს 5 400.0 ათასი ლარით.

### **მუხლი 23. საერთაშორისო საფინანსო ორგანიზაციებში საქართველოს მონაწილეობიდან გამომდინარე არსებული ვალდებულებები**

საერთაშორისო საფინანსო ორგანიზაციებში საქართველოს მონაწილეობიდან გამომდინარე არსებული ვალდებულებების შესრულების მიზნით გათვალისწინებულ იქნეს 4 092.0 ათასი ლარი. აღნიშნული ასიგნებიდან განხორციელდეს რეკონსტრუქციისა და განვითარების საერთაშორისო ბანკის, აზიის განვითარების ბანკის, ევროპის საბჭოს განვითარების ბანკის და სხვა საერთაშორისო საფინანსო ორგანიზაციების წინაშე ნაკისრი ვალდებულებების შესრულება.

### **მუხლი 24. ალგეთის და სიონის წყალსაცავების რეაბილიტაცია**

ალგეთის და სიონის წყალსაცავების რეაბილიტაციის ღონისძიებებისათვის განკუთვნილი ასიგნებების განკარგვა განხორციელოს საქართველოს მუნიციპალური განვითარების ფონდმა.

## **მუხლი 25. თანამდებობრივი სარგოები, პრემიები, დანამატები და დახმარებები**

1. უფლება მიეცეთ საქართველოს მინისტრებსა და სახელმწიფო მინისტრებს, მათდამი დაქვემდებარებული სამინისტროების აპარატების, საქვეუწყებო დაწესებულებებისა და ტერიტორიული ორგანოების საშტატო ნუსხები და თანამდებობრივი სარგოები განსაზღვრონ საქართველოს მთავრობასთან შეთანხმებით. საქართველოს მთავრობის კანცელარიის საშტატო ნუსხას და თანამდებობრივ სარგოებს განსაზღვრავს საქართველოს პრემიერ-მინისტრი.

2. საქართველოს მთავრობასთან შეთანხმებას საჭიროებს აგრეთვე ცვლილებები დამტკიცებულ საშტატო ნუსხებსა და თანამდებობრივ სარგოებში, გარდა იმ შემთხვევებისა, როდესაც განხორციელებული ცვლილებების შედეგად უცვლელი რჩება საშტატო რიცხოვნობა, თანამდებობათა დასახელებები და თანამდებობრივი სარგოები.

3. 2009 წლის განმავლობაში საქართველოს სახელმწიფო, აფხაზეთისა და აჭარის ავტონომიური რესპუბლიკებისა და ადგილობრივი თვითმმართველი ერთეულების ბიუჯეტების დაფინანსებაზე მყოფი დაწესებულებებისა და ორგანიზაციების მუშაკებზე პრემიების, საქართველოს კანონმდებლობით დადგენილი დანამატებისა და დახმარებების გაცემა განხორციელდეს მათთვის დამტკიცებული ასიგნებების ფარგლებში. ამასთანავე, მხარჯავი დაწესებულებები უფლებამოსილი არიან გაზარდონ მათთვის ამ კანონის ხარჯების ეკონომიკური კლასიფიკაციის „შრომის ანაზღაურების“ მუხლით დამტკიცებული ასიგნებები არა უმეტეს ამავე მუხლით დამტკიცებული ასიგნების 1/12-ისა.

4. საქართველოს სახელმწიფო ბიუჯეტით გამოყოფილი ასიგნებების ფარგლებში მხარჯავ დაწესებულებებს უფლება აქვთ, „საჯარო სამსახურის შესახებ“ საქართველოს კანონის 71-ე მუხლის მე-3 პუნქტის დებულება გაავრცელონ მხოლოდ იმ მოსამსახურეებზე, რომლებზედაც 2006 წლის 1 იანვრამდე ვრცელდებოდა აღნიშნული მუხლის მოქმედება.

## **მუხლი 26. წლის განმავლობაში მიღებული ფულადი გრანტები და მიზნობრივი დაფინანსება**

სამინისტროებისა და უწყებების მიერ მიღებული ფულადი გრანტებისა და მიზნობრივი დაფინანსების აღრიცხვა და ხარჯვა განხორციელდეს საქართველოს ფინანსთა სამინისტროს მიერ დამტკიცებული წესით.

## **მუხლი 27. სახელმწიფო პროგრამა „იაფი კრედიტი“**

სახელმწიფო პროგრამა „იაფი კრედიტის“ განხორციელების მიზნით:

ა) საქართველოს ეკონომიკური განვითარების სამინისტრომ უზრუნველყოს სხვადასხვა სფეროში მომუშავე საწარმოებისათვის უშუალოდ ან/და პარტნიორი კომერციული ბანკის (ბანკების) ან/და სხვა დაწესებულების მეშვეობით საკრედიტო რესურსის გამოყოფა შემდეგი პირობებით:

ა.ა) სახელმწიფო ბიუჯეტიდან ერთ ბენეფიციარ იურიდიულ პირზე (საწარმოზე) გასაცემი სესხის ოდენობა – 20.0 ათას ლარზე მეტი;

ა.ბ) კრედიტით სარგებლობის მაქსიმალური ვადა – 7 წელი;

ა.გ) საშელავათო პერიოდი – 2 წლამდე;

ა.დ) სესხით სარგებლობის წლიური განაკვეთი: პარტნიორი კომერციული ბანკებისათვის – წლიური 2 პროცენტი, ხოლო ბენეფიციარი ფიზიკური და იურიდიული პირებისათვის – არა უმეტეს 12 პროცენტისა;

ბ) საქართველოს ეკონომიკური განვითარების სამინისტრომ, აუცილებლობის შემთხვევაში, მოამზადოს და საქართველოს მთავრობას დასამტკიცებლად წარუდგინოს სახელმწიფო პროგრამა „იაფი კრედიტის“ ფარგლებში საკრედიტო რესურსის გაცემის წესი და სხვა დამატებითი პირობები.

## **მუხლი 28. საზღვარგარეთ საქართველოს დიპლომატიური დაწესებულებების (წარმომადგენლობების) შემოსულობათა ხარჯვა**

„საქართველოს საგარეო საქმეთა სამინისტროს სისტემაში შემავალი ბიუჯეტის მხარჯავი ერთეულების მიერ მიღებული საკონსულო მოსაკრებლებისა და ბიუჯეტის სხვა შემოსულობათა აღრიცხვისა და გამოყენების წესის შესახებ“ საქართველოს პრეზიდენტის 2004 წლის 6 მარტის №82 ბრძანებულების შესაბამისად, საზღვარგარეთ საქართველოს დიპლომატიური დაწესებულებების (წარმომადგენლობების) და საკონსულო დაწესებულებების მიერ მიღებული საკონსულო მოსაკრებლებისა და ბიუჯეტის სხვა შემოსულობების ხარჯვა განხორციელდეს ადგილზე, შესაბამისი დაწესებულებისა და წარმომადგენლობისათვის ამ კანონით დამტკიცებული ასიგნებების ფარგლებში.

## **მუხლი 29. პოლიტიკური პარტიების დაფინანსება**

საქართველოს ცენტრალურმა საარჩევნო კომისიამ ამ კანონით დამტკიცებული ორგანიზაციული კლასიფიკაციის კოდიდან „06 03 – პოლიტიკური პარტიების დაფინანსება“ 2 093.3 ათასი ლარი, „მოქალაქეთა პოლიტიკური გაერთიანებების შესახებ“ საქართველოს ორგანული კანონის შესაბამისად, გადაურიცხოს საჯარო სამართლის იურიდიულ პირს – განვითარებისა და რეფორმების ფონდს.

## **მუხლი 30. საქართველოს თავდაცვის სამინისტროს მიერ ზოგიერთი ღონისძიების დაფინანსება**

1. უფლება მიეცეს საქართველოს თავდაცვის სამინისტროს, 2008 წელს „საქონელი და მომსახურების“ და „არაფინანსური აქტივების ზრდის“ მუხლებით გათვალისწინებული ასიგნებებით შესრულებული სამუშაოების დაფინანსება, რომელთა უწყვეტი განხორციელება აუცილებელია შეიარაღებული ძალების აღმშენებლობისა და თავდაცვისუნარიანობის ამაღლების მიზნით სახელმწიფოს მიერ ნაკისრი ვალდებულებების შესასრულებლად, განხორციელოს ამ კანონით საქართველოს თავდაცვის სამინისტროსათვის „საქონელი და მომსახურების“ და „არაფინანსური აქტივების ზრდის“ მუხლებით დამტკიცებული ასიგნებების ფარგლებში.

2. საქართველოს თავდაცვის მინისტრის ინდივიდუალური ადმინისტრაციულ-სამართლებრივი აქტით განსაზღვრულ შემთხვევაში და დაწესებული ლიმიტის ფარგლებში, საქართველოს თავდაცვის სამინისტროს ქვედანაყოფების (ერთეულების) მიერ შესასყიდ საქონელზე, სამუშაოსა და მომსახურებაზე საქართველოს თავდაცვის

მინისტრის ამავე აქტით დადგენილი სტრუქტურული ქვედანაყოფები (ერთეულები) ითვლებიან შემსყიდველ ორგანიზაციებად და ეკისრებათ სახელმწიფო შესყიდვების შესახებ საქართველოს კანონმდებლობით გათვალისწინებული უფლება-მოვალეობანი და პასუხისმგებლობა.

### **მუხლი 31. საქართველოს პროკურატურისა და საქართველოს შინაგან საქმეთა სამინისტროს საქსპერტო მომსახურება**

საჯარო სამართლის იურიდიულმა პირმა – ლევან სამხარაულის სახელობის სასამართლო ექსპერტიზის ეროვნულმა ბიურომ საქართველოს პროკურატურისათვის და საქართველოს შინაგან საქმეთა სამინისტროსათვის მომსახურების გაწევა განახორციელოს საზღაურის გარეშე.

### **მუხლი 32. საქართველოს განათლებისა და მეცნიერების სამინისტროს პროგრამა „ცოდნის კარის“ განხორციელება**

საქართველოს განათლებისა და მეცნიერების სამინისტრომ პროგრამა „ცოდნის კარისთვის“ გათვალისწინებული ასიგნებების ხარჯვა განახორციელოს საქართველოს მთავრობის მიერ დადგენილი წესით.

### **მუხლი 33. საქართველოს ლტოლვილთა და განსახლების სამინისტროს მიერ განსახორციელებელი ღონისძიებები**

1. 2009 წლისათვის ორგანიზებულად განსახლებული ერთი დევნილისა და ლტოლვილის მიერ მოხმარებული ელექტროენერჯის საფასურის დაფინანსება თვეში განისაზღვროს ქალაქ თბილისში 13.48 ლარით, ხოლო საქართველოს სხვა რეგიონებში – 12.98 ლარით. აღნიშნული დაფინანსება ცენტრალიზებულად განახორციელოს საქართველოს ლტოლვილთა და განსახლების სამინისტრომ.

2. დევნილთა და ლტოლვილთა ორგანიზებულად განსახლების ობიექტების ადმინისტრაციის, საყოფაცხოვრებო და კომუნალური მომსახურების ხარჯები (მათ შორის, ობიექტებში განსახლებულ დევნილთა და ლტოლვილთა მიერ მოხმარებული წყლის, ნარჩენების გატანის, ასენიზაციისა და დეზინფექცია-დერატიზაციის, ჩასახლების ობიექტებში მომსახურებისა და მიმდინარე შეკეთების სხვა ხარჯები) ერთ დევნილსა და ლტოლვილზე განისაზღვროს თვეში არა უმეტეს 5 ლარისა. აღნიშნულის დაფინანსება განხორციელდეს სახელშეკრულებო ვალდებულებების შესაბამისად. ხელშეკრულების პირობებსა და მის გასაფორმებლად საჭირო დოკუმენტაციას ადგენს საქართველოს ლტოლვილთა და განსახლების სამინისტრო.

3. 2008 წლის აგვისტოში რუსეთის ფედერაციის სამხედრო აგრესიის შედეგად დაზარალებული მოსახლეობის მიერ ორგანიზებულად ჩასახლების ობიექტებში 2008 წლის 9 აგვისტოდან მოხმარებული ბუნებრივი აირის, ელექტროენერჯისა და წყლის საფასურის, აგრეთვე დასუფთავების ხარჯების ანაზღაურება განახორციელოს საქართველოს ლტოლვილთა და განსახლების სამინისტრომ, შესაბამისი მომსახურე ორგანიზაციებიდან წარდგენილი ფაქტობრივი დანახარჯების მიხედვით.

### მუხლი 34. საქართველოს შრომის, ჯანმრთელობისა და სოციალური დაცვის სამინისტროს მიერ განსახორციელებელი ღონისძიებები

1. საქართველოს შრომის, ჯანმრთელობისა და სოციალური დაცვის სამინისტროს სისტემაში განსახორციელებელ 2009 წლის სახელმწიფო პროგრამებით გათვალისწინებულ ცალკეულ ღონისძიებებში გაგრძელდეს და აუცილებლობის შემთხვევაში შემოღებულ იქნეს ღონისძიებათა ნაწილის ანაზღაურება მოსახლეობის მიერ თანაგადახდის პრინციპით. თანაგადახდის წესს, ფორმასა და მოცულობას განსაზღვრავს საქართველოს შრომის, ჯანმრთელობისა და სოციალური დაცვის სამინისტრო.

2. საქართველოს შრომის, ჯანმრთელობისა და სოციალური დაცვის სამინისტროს სისტემაში განსახორციელებელ 2009 წლის სახელმწიფო პროგრამებით გათვალისწინებულ ღონისძიებათა დაფინანსების, თანადაფინანსების, ანგარიშსწორების წესებსა და ძირითად პრინციპებს განსაზღვრავს საქართველოს შრომის, ჯანმრთელობისა და სოციალური დაცვის სამინისტრო, თუ საქართველოს კანონმდებლობით სხვა რამ არ არის დადგენილი.

3. საქართველოს შრომის, ჯანმრთელობისა და სოციალური დაცვის სამინისტროს სახელმწიფო კონტროლს დაქვემდებარებული საჯარო სამართლის იურიდიული პირი – საქართველოს ჯანმრთელობისა და სოციალური დაცვის პროექტების განმახორციელებელი ცენტრი განკარგავს და ახორციელებს „სამედიცინო და სამინისტროს სისტემის დაწესებულებათა რეაბილიტაციისა და აღჭურვის სახელმწიფო პროგრამას“, „დიპლომის შემდგომი სამედიცინო განათლების პროგრამას“, აგრეთვე ჯანმრთელობის დაცვის შემდეგ პროგრამებსა და პროექტებს: „აივ/შიდსის, ტუბერკულოზისა და მალარიის პრევენციისა და კონტროლის ეფექტიანი განხორციელების მიზნით არსებული ეროვნული რეაგირების გაძლიერება საქართველოში (გლობალ ფონდი)“, „პირველადი ჯანდაცვის განვითარების პროექტი“, „ფრინველის გრიპის კონტროლისა და ადამიანებში პანდემიისათვის მზადყოფნისა და მასზე რეაგირების პროექტი“, „პირველადი ჯანდაცვის რეფორმის მხარდაჭერის პროექტი (ევროკავშირი)“.

4. საქართველოს შრომის, ჯანმრთელობისა და სოციალური დაცვის სამინისტროს სახელმწიფო კონტროლს დაქვემდებარებულ საჯარო სამართლის იურიდიულ პირს – სოციალური სუბსიდიების სააგენტოს შეეცვალოს სახელი და ეწოდოს საჯარო სამართლის იურიდიული პირი – სოციალური მომსახურების სააგენტო.

5. „სოციალური დახმარებების პროგრამის“ ფარგლებში:

ა) უმწეო მდგომარეობაში მყოფი ოჯახებისა და პირების ქვემოთ მითითებულ კატეგორიებზე (მათ შორის, დევნილთა ოჯახებზე) 2007 წლის 1 იანვრამდე ღანიშნული ყოველთვიური დახმარებების გაცემა გაგრძელდეს შემდეგი ოდენობებით:

ა.ა) მარტონხელა არამომუშავე პენსიონერთა ერთსულიან ოჯახზე – 22 ლარი, არამომუშავე პენსიონერთა ორ- და მეტსულიან ოჯახზე – 35 ლარი;

ა.ბ) დედ-მამით ობოლ 18 წლამდე ასაკის ბავშვებზე, მეურვის შრომისუნარიანობის მიუხედავად, ერთ ბავშვზე – 22 ლარი;

ა.გ) შეზღუდული შესაძლებლობის მქონე, არამომუშავე, მკვეთრად გამოხატული შეზღუდული შესაძლებლობის მქონე უსინათლოებზე, ერთ პირზე – 22 ლარი;

ა.დ) 18 წლამდე ასაკის შეზღუდული შესაძლებლობის მქონე ბავშვებზე, ერთ ბავშვზე – 22 ლარი;

ა.ე) მრავალშვილიან ოჯახზე, რომელსაც ჰყავს 7 ან 7-ზე მეტი 18 წლამდე ასაკის ბავშვი – 35 ლარი;

ბ) გაგრძელდეს „სოციალური დახმარების შესახებ“ საქართველოს მთავრობის 2006 წლის 28 ივლისის №145 დადგენილებით გათვალისწინებული საარსებო შემწეობის გაცემა საქართველოს მთავრობის მიერ განსაზღვრული წესითა და პირობებით იდენტიფიცირებულ სოციალურად დაუცველ ოჯახებზე;

გ) ამ პუნქტის „ა“ ქვეპუნქტით გათვალისწინებული სოციალური დახმარება შეუწყდეთ უმწეო მდგომარეობაში მყოფ იმ ოჯახებს, რომლებიც მოხვდებიან მთავრობის მიერ განსაზღვრული წესითა და პირობებით იდენტიფიცირებულ სოციალურად დაუცველი ოჯახების მონაცემთა ერთიან ბაზაში და დაენიშნებათ „სოციალური დახმარების შესახებ“ საქართველოს მთავრობის 2006 წლის 28 ივლისის №145 დადგენილებით გათვალისწინებული საარსებო შემწეობა;

დ) დაფინანსდეს პროგრამის განხორციელებასთან დაკავშირებული ყველა საჭირო ღონისძიება.

6. განისაზღვროს სახელმწიფო პენსიის შემდეგი ოდენობები:

ა) მინიმალური სახელმწიფო პენსია – 55 ლარი;

ბ) საპენსიო ასაკის საფუძვლით დანიშნული სახელმწიფო პენსია 2009 წლის 1 იანვრიდან – 75 ლარი, ხოლო 2009 წლის 1 ნოემბრიდან – 80 ლარი;

გ) მკვეთრად გამოხატული შეზღუდული შესაძლებლობის მქონე პირებისთვის დანიშნული სახელმწიფო პენსია 2009 წლის 1 იანვრიდან – 75 ლარი, ხოლო 2009 წლის 1 ნოემბრიდან – 80 ლარი;

დ) შეზღუდული შესაძლებლობის (გარდა მკვეთრად გამოხატულისა) სტატუსის საფუძვლით დანიშნული სახელმწიფო პენსია 2009 წლის 1 იანვრიდან – 65 ლარი, ხოლო 2009 წლის 1 ნოემბრიდან – 70 ლარი;

ე) მეორე მსოფლიო ომის:

ე.ა) მკვეთრად და მნიშვნელოვნად გამოხატული შეზღუდული შესაძლებლობის მქონე პირებისთვის – 129 ლარი;

ე.ბ) ზომიერად გამოხატული შეზღუდული შესაძლებლობის მქონე პირებისთვის – 80 ლარი;

ე.გ) მონაწილეებისთვის – 80 ლარი;

ვ) ტერიტორიული მთლიანობისათვის, თავისუფლებისა და დამოუკიდებლობისათვის საბრძოლო მოქმედების და სხვა სახელმწიფოთა ტერიტორიაზე საბრძოლო მოქმედების;

ვ.ა) მკვეთრად და მნიშვნელოვნად გამოხატული შეზღუდული შესაძლებლობის მქონე პირებისთვის – 84 ლარი;

ვ.ბ) ზომიერად გამოხატული შეზღუდული შესაძლებლობის მქონე პირებისთვის – 70 ლარი;

ზ) ამ კანონით გათვალისწინებულის გარდა, სხვა სახელმწიფო პენსიის ოდენობები (მათ შორის, დანამატები) განისაზღვრება საქართველოს კანონმდებლობის შესაბამისად.

7. 2009 წლის განმავლობაში დევნილთა და ლტოლვილთა შემწეობების გაცემა განხორციელოს საქართველოს შრომის, ჯანმრთელობისა და სოციალური დაცვის სამინისტროს სახელმწიფო კონტროლს დაქვემდებარებულმა საჯარო სამართლის იურიდიულმა პირმა – სოციალური მომსახურების სააგენტომ.

8. 2009 წლისათვის ორგანიზებულად განსახლებულ ერთ დევნილსა და ლტოლვილზე გასაცემი ყოველთვიური შემწეობა განისაზღვროს 22 ლარის, ხოლო კერძო სექტორში განსახლებულ ერთ დევნილსა და ლტოლვილზე – 28 ლარის ოდენობით.



9. ორსულობის, მშობიარობისა და ბავშვის მოვლის, აგრეთვე ახალშობილის შვილად აყვანის გამო და დროებითი შრომისუუნარობის გამო დახმარებები გაიცემა საქართველოს შრომის, ჯანმრთელობისა და სოციალური დაცვის სამინისტროს მიერ დადგენილი წესითა და პირობებით.

10. საქართველოს შრომის, ჯანმრთელობისა და სოციალური დაცვის სამინისტროს მიეცეს უფლება, განსაზღვროს:

ა) 2008 წლის შრომის, ჯანმრთელობისა და სოციალური დაცვის იმ სახელმწიფო პროგრამების და მათი ღონისძიებების, აგრეთვე საქართველოს განათლებისა და მეცნიერების სამინისტროს 2008 წლის პროგრამა „ბავშვზე ზრუნვის“ (გარდა სპეციალური საგანმანათლებლო საჭიროების მქონე ბავშვების განათლების კომპონენტებისა) იმ ღონისძიებათა მოცულობები, რომელთა განხორციელებაც გაგრძელდება საქართველოს შრომის, ჯანმრთელობისა და სოციალური დაცვის სამინისტროს სისტემაში განსახორციელებელი 2009 წლის სახელმწიფო პროგრამების ასიგნებების ფარგლებში, „სახელმწიფო შესყიდვების შესახებ“ საქართველოს კანონის მოთხოვნათა შესრულებამდე;

ბ) „შეზღუდული შესაძლებლობის მქონე პირთა, ხანდაზმულთა და ოჯახურ მზრუნველობას მოკლებულ ბავშვთა სოციალური რეაბილიტაციის ხელშეწყობის სახელმწიფო პროგრამისა“ და პროგრამა „ბავშვზე ზრუნვის“ (გარდა სპეციალური საგანმანათლებლო საჭიროების მქონე ბავშვების განათლების კომპონენტებისა) ის ქვეპროგრამები/ღონისძიებები, რომლებიც უნდა განხორციელოს საქართველოს შრომის, ჯანმრთელობისა და სოციალური დაცვის სამინისტრომ, საქართველოს შრომის, ჯანმრთელობისა და სოციალური დაცვის სამინისტროს სახელმწიფო კონტროლს დაქვემდებარებულმა საჯარო სამართლის იურიდიულმა პირმა – სოციალური მომსახურების სააგენტომ ან საქართველოს შრომის, ჯანმრთელობისა და სოციალური დაცვის სამინისტროს მმართველობის სფეროში შემავალმა სახელმწიფო საქვეუწყებო დაწესებულებამ – ჯანმრთელობისა და სოციალური პროგრამების სააგენტომ.

11. საქართველოს შრომის, ჯანმრთელობისა და სოციალური დაცვის სამინისტროს სისტემაში განსახორციელებელი 2009 წლის სახელმწიფო პროგრამების დამტკიცებამდე ან/და „სახელმწიფო შესყიდვების შესახებ“ საქართველოს კანონის მოთხოვნათა შესრულებამდე გაგრძელდეს 2008 წლის შრომის, ჯანმრთელობისა და სოციალური დაცვის სახელმწიფო პროგრამებით, აგრეთვე საქართველოს განათლებისა და მეცნიერების სამინისტროს 2008 წლის პროგრამა „ბავშვზე ზრუნვის“ (გარდა სპეციალური საგანმანათლებლო საჭიროების მქონე ბავშვების განათლების კომპონენტებისა) ღონისძიებები, რომელთა უწყვეტი განხორციელებაც აუცილებელია სახელმწიფოს მიერ ნაკისრი ვალდებულებების შესასრულებლად, და, შესაბამისად, ხელშეკრულებები გაფორმდეს იმავე მომწოდებლებთან. ამასთანავე, აღნიშნულის შესახებ ეცნობოს საქართველოს პარლამენტის ჯანმრთელობის დაცვისა და სოციალურ საკითხთა კომიტეტს და საჯარო სამართლის იურიდიულ პირს – საქართველოს სახელმწიფო შესყიდვების სააგენტოს.

12. საქართველოს შრომის, ჯანმრთელობისა და სოციალური დაცვის სამინისტროს სახელმწიფო პროგრამების ფარგლებში 2008 წლის დეკემბერში შესრულებული სამუშაოების დაფინანსება განხორციელდეს საქართველოს 2009 წლის სახელმწიფო ბიუჯეტით გათვალისწინებული, საქართველოს შრომის, ჯანმრთელობისა და სოციალური დაცვის მინისტრის მიერ განსაზღვრული პროგრამების ასიგნებებიდან.

13. სოციალურ პროგრამებს, გარდა „შეზღუდული შესაძლებლობის მქონე პირთა, ხანდაზმულთა და ოჯახურ მზრუნველობას მოკლებულ ბავშვთა სოციალური რეაბილიტაციის ხელშეწყობის სახელმწიფო პროგრამისა“, აგრეთვე პროგრამა „ბავშვზე ზრუნვის“ ნაწილს (გარდა სპეციალური საგანმანათლებლო საჭიროების მქონე

ბავშვების განათლების კომპონენტებისა) ახორციელებს საქართველოს შრომის, ჯანმრთელობისა და სოციალური დაცვის სამინისტროს სახელმწიფო კონტროლს დაქვემდებარებული საჯარო სამართლის იურიდიული პირი – სოციალური მომსახურების სააგენტო.

14. ჯანმრთელობის დაცვის სახელმწიფო პროგრამებს ახორციელებს საქართველოს შრომის, ჯანმრთელობისა და სოციალური დაცვის სამინისტროს მმართველობის სფეროში შემავალი სახელმწიფო საქვეუწყებო დაწესებულება – ჯანმრთელობისა და სოციალური პროგრამების სააგენტო.

15. სოციალური შეღავათების მონეტიზაციის პროგრამა განხორციელდეს „სოციალური შეღავათების მონეტიზაციის შესახებ“ საქართველოს მთავრობის 2007 წლის 11 იანვრის №4 დადგენილების შესაბამისად.

16. „დაავადებათა პრევენციის სახელმწიფო პროგრამის“ „იმუნიზაციის კომპონენტით“ გათვალისწინებული ვაქცინებისა და შპრიცების შესყიდვა განხორციელდეს გაეროს ბავშვთა ფონდის მეშვეობით, ერთ პირთან მოლაპარაკების საშუალებით, ხოლო აღნიშნული კომპონენტით გათვალისწინებული იმ ვაქცინებისა და შპრიცების, რომელთა შესყიდვა ვერ ხორციელდება გაეროს ბავშვთა ფონდის მეშვეობით, შესყიდვა განხორციელდეს „სახელმწიფო შესყიდვების შესახებ“ საქართველოს კანონის შესაბამისად.

17. „გულის ქირურგიის სახელმწიფო პროგრამით“ გათვალისწინებული ღონისძიებები აჭარის მოზრდილი მოსახლეობისათვის დაფინანსდეს აჭარის ავტონომიური რესპუბლიკის ბიუჯეტიდან.

18. „სამედიცინო მომსახურების სხვა სახელმწიფო პროგრამების“ „სასწრაფო დახმარების სახელმწიფო პროგრამით“ გათვალისწინებული ღონისძიებები ქალაქ თბილისის მოსახლეობისათვის დაფინანსდეს ქალაქ თბილისის ბიუჯეტიდან.

19. „დიპლომის შემდგომი სამედიცინო განათლების პროგრამა“ ითვალისწინებს 2007 წლამდე სახელმწიფო დაკვეთით მიღებული რეზიდენტების მომზადებას.

20. „დიაბეტიან ბავშვთა და მოზარდთა მკურნალობისა და რეაბილიტაციის კომპონენტი“ დაფინანსდეს 2009 წლის 1 აპრილამდე, ხოლო „დიაბეტიტ დაავადებულ მოზრდილ ავადმყოფთა მედიკამენტებით უზრუნველყოფის კომპონენტი“ და „დიაბეტიან ბავშვთა და მოზარდთა მედიკამენტებით უზრუნველყოფის კომპონენტი“ განხორციელდეს 2009 წლის განმავლობაში.

### **მუხლი 35. ყაზბეგისა და ღუშეთის რაიონების მაღალმთიანი სოფლების მოსახლეობისათვის მიწოდებული ბუნებრივი აირის ღირებულების ანაზღაურება**

ყაზბეგის რაიონში მუდმივად მცხოვრები და ღუშეთის რაიონის მაღალმთიანი სოფლებში (სეთურებში, ჯაღმთანში, ზაქანში, ხადაში და კაიშაურში) მცხოვრები მოსახლეობის მიერ მოხმარებული ბუნებრივი აირის ღირებულება ანაზღაურდეს 2009 წლის 1 იანვრიდან 15 მაისამდე და 2009 წლის 15 ოქტომბრიდან 31 დეკემბრამდე პერიოდებში – თითოეულ აბონენტზე თვეში არა უმეტეს 700 მ<sup>3</sup>-ისა (მაისსა და ოქტომბერში არა უმეტეს 350 მ<sup>3</sup>-ისა).

**მუხლი 36. ზოგიერთი საბიუჯეტო ორგანიზაციისათვის სახელმწიფო ბიუჯეტიდან გამოყოფილი ასიგნებების ხარჯვის უფლებამოსილების მინიჭება**

მთავარმა არქიტექტურულ-სამშენებლო ინსპექციამ (არქმშენინსპექციამ), საქართველოს საავტომობილო გზების დეპარტამენტმა, ერთიანმა სატრანსპორტო ადმინისტრაციამ, სასჯელაღსრულების დეპარტამენტმა, არასაპატიმრო სასჯელთა აღსრულებისა და პრობაციის ეროვნულმა სამსახურმა, საჯარო სამართლის იურიდიულმა პირმა – სასჯელაღსრულებისა და პრობაციის სასწავლო ცენტრმა, საჯარო სამართლის იურიდიულმა პირმა – იურიდიული დახმარების სამსახურმა ასიგნებების ხარჯვა განახორციელონ ამ კანონით დამტკიცებული ორგანიზაციული კლასიფიკაციის შესაბამისი კოდებიდან: მთავარი არქიტექტურულ-სამშენებლო ინსპექცია (არქმშენინსპექცია) – 25 02, საგზაო ინფრასტრუქტურის განვითარების ღონისძიებები – 25 03, ერთიანი სატრანსპორტო ადმინისტრაცია – 25 04, სასჯელაღსრულების დეპარტამენტი – 27 02, არასაპატიმრო სასჯელთა აღსრულებისა და პრობაციის ეროვნული სამსახური – 27 03, სსიპ – სასჯელაღსრულებისა და პრობაციის სასწავლო ცენტრი – 27 04, სსიპ – იურიდიული დახმარების სამსახური – 27 05.

**მუხლი 36<sup>1</sup>. სამხრეთ ოსეთის ადმინისტრაციის მიერ განსახორციელებელი ღონისძიებები**

2009 წლის განმავლობაში სამხრეთ ოსეთის ადმინისტრაციის ხელმძღვანელი უფლებამოსილია ადმინისტრაციისათვის ამ კანონით დამტკიცებული ასიგნებებიდან თავისი გადაწყვეტილების საფუძველზე გასცეს ერთჯერადი დახმარებები.